

ESTD : OCTOBER, 1994
THLA TIN CHHUAK CHANCHINBU

SEPTEMBER 2018

Kristian Naupang



Vol. 24 Issue No. 288



Taiwan Kristian Naupang

Thil pathum 4

Thih nawmna11

Hawh teh, hlilm takin ei rawng i bawl ang20

Tennis player ropui pahnih17

Kum 24-na

September 2018

Bu 288-na

Editor

Upa C. Lalbiaktluanga

Managing Editor

Rev. Dr. C. Chawngminglana

Joint Editors

Lalremmawia

Upa B. Lalhmunlana

John Lalhruaitluanga

Upa Dr. C. Vanlalhruaia

Circulation Manager

Lalfakzuala

K R I S T I A N N A U P A N G

Synod Office First Floor
Mission Veng, Aizawl – 796 001
Phone - 0389-2324590

e-mail:

kristiannaupang@gmail.com

A man pe duh leh a bu la duh
chuan Circulation Manager
hriattir tur a ni.

Kum khat lak man ₹ 50.

Kristian Naupanga thu chhuahte hi Editor ngaih dan a ni vek kher lo.

A chhunga thu awmte	Phek
1. Editorial	1
2. Thu awihna	2
3. Thil pathum	4
4. Tawngtaina chhangtu Pathian	8
5. Thih nawmna	11
6. <i>Biangbiakna</i> : Lalbiakthuama	13
7. Federer-a leh Nadal-a khaikhinna	17
8. Hawh teh, hlim takin ei rawng i bawl ang	20
9. Pathianni	23
10. Hriatzauna Huang	25
11. Hre thei rawh	27
12. <i>Hla chham mi</i> : Naupang Inkhawmpui	28
13. Pathian ropui nan football ka khel thin	29
14. Chei chhuah	32
Zawng chhuak rawh	A kawm chhungah



World Cup Football

Infiamna chi hrang hrang zinga khawvelin a ngaihhlut ber *World Cup Football* 2018 chu July 15, 2018 zan khan zawh fel a lo ni ta. Khawvel ram hrang hrang atangin *World cup* khel thei tura inpet tling ram 32-te chuan *World Cup* thlengtu Russia ram an pan.

Team 32-te chu group 8-ah inthenin an han inkhel kual a, a tawpah chuan rin loh takin FIFA *ranking*-a a thiam ram – Germany, Brazil, Spain, Argentina-te an tla a, a vannei ber team pahnih – France leh Croacia chuan final an lut ta nawlh mai. Khawvel mipui, thlirtu maktaduai tam tak hmaah France chuan 4–2-in Croatia chu hnehin a thiam ber ram an lo ni ta.

Champion tawh ramte leh an champion zat chu: Brazil–5, Germany–4, Italy–4, Argentina–2, France–2 Uruguay–2, England–1, Spain–1.

Keini Kristiante pawh hi thlirtu tam tak hual vel kara intihsiaik kan ni a, khelh that lawmman hi kan dawng ang em tih kan inen fiah fo a pawimawh hle mai.

Kan tum ber chu Setana hneh a ni. Kan chak tawh zat te, kan chak loh zat te, kan goal khung zat te vanin a chhinchhiah vek a ni tih i hre reng ang u.

Rorelna ni ropui, nakina lo thleng turah khelh that lawmman kan dawng dawn a ni. Beiseina sang tak nen Isua tan i khel zel ang u.

THUAWIHNA

– *Laldinmawii*
Khatla

Sikul kal tawh vek kan ni bawk a, thu awihna tih hi kan hre thiam vek ngei ang. Thu awihna han tih hian nu leh pa leh zirtirtute kan ngaihtuah chhuak nghal mai thei. Tunah naupang ni mah ila, naupang kan ni reng dawn lo va, nakin lawka puitling tur kan ni a, thil zir tur kan ngah em em a; chu vang chuan zirtirtu leh zilhtu kan mamawh a ni.

Thu awih tur hian kan hriat reng tur chu mahni inthunun (self control) a ni. Mi fel leh rin tlak ni tura pawimawh ber chu thu awihna hi a ni.

Pathian kan hmu thei lo va, a aiawhtute chu kan nu leh pate hi an ni a; chu vang chuan Kristian naupang chuan nu leh pa thu kan awih ngei ngei tur a ni. Kan nu leh pate hian min hmangaih em em a, kan fel loh leh puitlin loh an hlauh avangin thu thate hrilhin min zilh thin a. Naupang fel chuan an zawm mai a, nungchang mawi tak an neih phah thin a ni. Amaherawhchu, naupang thenkhat chuan zilhna te hi an

hre thiam lo va, an titau vak vak thin a. Hei hi a tha lo em em a, thu tha zawm duh lote chu naupang sual an lo ni mai thin a ni.

Kan nu leh paten min hauh hian min duat lo tihna a ni lo va, kan thiltih dik lohvah chuan min hau ngei ngei zawk tur a ni a, hau tu leh zilhtu neih hi kan vannei em em zawk a ni. Kan thawh theih tawk min thawhtir hian min tiduhdah tihna a ni lo tih hriat bawk tur a ni a. Mahni inenkawl thei tur chuan thil chi hrang hrang kan thiam ve a ngai a, chungte chu tih ve zel loh chuan a thiam theih loh va, chu vang chuan min tirhnaah te thu awih taka



kala, ti tura min tihte tih ve
zel tur a ni.

Mahni inthunun rual kan
ni tawh bawk a, nu leh pa bul
lovah pawh kan fel tawh em
em a, kan zun a chhuaha cheh
lova kan awm te hi kan
inthunun tihna a ni. Kan nu
leh pate emaw, chhungte
emaw kan bulah an awm reng
thei lo va, mahnia kan awm
pawhin Pathianin min hmu
reng tih hria ila. Thil tha lo
hrang hrang – dawt sawi te,
thil ruk te, len bo te, mi velh
te, inkhawm loh mai mai te
leh thil dang tha lo kan hriat
lakah kan inthunun tlat ang
a, naupang fel kan ni zel mai
dawn a ni.

Thu awih lova thil tha lo
ti reng chung pawhin a than
len ve theih tho va; mahse,
mi tlaktlailo leh mite tana
hnawksak an lo ni thin a.
Heng mite hi chu nu leh pate
pawhin kawm an phal lo va,
khawtlang tan pawh buai-
puiawm an lo ni thin.

Mite tana hnawksak ni lo
tur hian tun atanga thu kan
awih a tul a. Mi tana tangkai
nih hi a hlu em em a, mite
duh loh nih ai chuan mite
mamawh nih a tha zawk a,
kan tum tlat chuan kan ni thei
a ni. Chutiang mi ni tur chuan
nu leh pa, zirtirtute thu kan
awih tur a ni.

THIL PATHUM

– *Lalremruata Renthlei*
Sacrament Dept. ztu
Ramhlun North

Chapo leh invilik loh tur

Thil tha leh pawimawh tak hlawhtling taka kan tih leh thawh a awmin nuam kan ti thin a, a chhuanawm bawh thin. Hlawhtling taka thil kan tiha keimahnia lawmna awma, inchhuanna riau awm hi sual a ni lem lo.

Bible chuan taima taka tia theihtawp chhuah thin turin min ti a. 'Hlim taka awma, an nun chhunga thil tha an tih aliama an tana tha zawk eng mah ka hre lo. Tichuan, mi tin, ei leh in leh an thawh rimna zawng zawnga hlim taka an awm chu Pathian thil pek a ni' (Thuh 3:12-13) tiin a sawi.

Mahse, hlawhtlinna kan neiha kan indah san lutuk leh mi dangte aia tha ber anga kan inngaih chiaha chapona chu tur hlauhawm takah a chang ta thin a ni. Chapona chu Pathianin a huat em em mai a ni a, a chhan chu induh takah min siana kan nihna aia sang leh thaah inhriatna min

siam thin. Tih dik loh kan neih theih lakah kan mit a tidel tlat a, mi dangte lakah min la hrang tlat bawh a. A chhan chu mi tu mahin chapo tak, mi chung a invilika, mi hnehsawh thei tak an ngaina lo. Bible-in 'Mahni ngaihin intifing suh la, Lalpa chu thin la, sual kalsan rawh,' a ti (Thuf 3:7).

A pawl lai ber chu – chapona te, inchhuanna te chuan Pathian nena kan inzawmna a chhu chat thin. Pathian hi kan mamawh lo emaw, a tel lo pawhin tha tawkah kan inngai emaw a nih chuan thuthlung hlui huna Aigupta lal Pharaoh, 'Tu nge maw ni Lalpa, a thu ka han

zawma, Israel-hote ka han chhuahtirna tur chu ni le? Lalpa chu ka hre lo ve; tin, Israel-a hote lah ka chhuahtir hek lo vang, ' titu ang mai kan ni ang.

Mi rel loh tur

Kristiante chu Isua anga ngilnei leh hmangaihna ngah ni tur an ni a. Isua zuitu inti chung sia mi dang sawichhe



Pathianin talent min pe vek a, heng kan talent neih leh dawnte hi min petu Pathian ropui nan kan hmang tur a ni. Lehkathiam tak, music thiam tak, infiam mi, thiam tak, drawing thiam tak te pawh kan ni thei a, mi tin mai hi Pathianin talent min pe theuh va, talent min pekte chapopui nana hmang hauh lova, inngaitlawm taka Lalpa hnena lawm thu sawi chung a ropui nana hmang tur kan ni.

fo leh mi rel ching tak chuan Isua thupek a zawm lo hle a ni. Isua chuan, “Hei hi ka thupek a ni, keiin ka hmangaih che u ang bawkin nangni inhmangaih ula,” (Jn 15:12) a ti.

Mi dang chanchin sawia, nasa taka kan sawisel thin te hi a dik lo hle a, mihring kan inang lo va, a then chu harh tak te, hlim thei tak te, a then chu ngawi reng leh tawng tam

lo te kan ni. Ngawi chut chut chi aia harh deuh an sualna bik a awm lo va, Pathianin thiante zingah pawh harh deuh bik tura a siam an ni mai.

Mi kan sawisel a, tihchhiat emaw kan tum ang lek leka kan rel phar vak hian thu dik behchhan a nei duh lo khawp mai a, dawt kan phuah chawp leh thu dik phena dawt kan belh zel a ni duh hle a ni. Dawt nena kan belh tawh phe chu an a thlen hlat poh leh a dawt muhlum tial tial tawh mai thin a. A dik lo baw a. A chhan chu anmahni tihchhiat nan, rel nan, an chezia emaw, mizia emaw kan ei loh avang ringawta an hnung lama kan sawiselna chu a dik thlawt lo a ni. Mi kan sawisela kan rel hian keimahni indahsan duhna leh indah pawimawh duhna avang a ni zel baw a, chu chu a dik miah lo baw.

Dawt thu leng leh hnung lama inrel phar avang hian thil duhawm lo tak tak a thleng tawh a. Mi hmingtha tam tak dawt thu hmanga

tihnatin an awm tawh a, kohhrana mi tam tak mi sawichhiat ching tak tak avangin tihchhiatin an awm tawh a, damna leh remna aiin harsatna leh innghirnghona a thlen a. Bible pawhin, “Inhauna te, initsikna te, thinurna te, inkhinna te, inrelna te, sesea thu lak te, inngaihhlut lutukna te, buaina te a lo awm dah ang,” (2 Kor 12:20) tiin a sawi.

Kristian inti chung a mi rel ching viau te avangin intilungngai duh hauh thung suh. Isua i rinna sawhngheh leh zual a ngai a ni tih inhrilh hriat nan hmang zel zawk la. Lal Isua chu a rin tlak a, sualna nei ve lo, a ka atanga dawt thu chhuak ve ngai lo a ni tih kan hre reng tur a ni.

I ro (asset) neih i hria em?

Pathian siam he khawvel nuam leh mawi takah hian thil mawi leh tha, duhawm tam tak a awm a. He leia cheng a hmangaihtena leia kan awm chhunga kan chen tura a dah a ni hlawn.

Pathianin mihring mipa leh hmeichhiaah min siam a, tute pawh Pathian aṭanga chhuak vek kan ni a, thlarau kan nei vek a, kan taksa leh mizia te erawh a in ang lo thung. Chhia leh ṭha hriatna pek vek kan nih avangin duhthlanna neia thutlukna siam tura zalenna nei kan ni thung.

He khawvel hi kan la chhuahsan vek dawn a, tu mah dam reng tur kan awm lo. Tleirawl tha zat leh chak lai hian, 'kan la thi vek dawn,' tih hi inhrilh nawn fo tur. Eng hunah mah kan thih hun kan hriat theih dawn loh avangin thi tura kan inpeih reng a ngai thung.

Pathianin leia min la dah chhung chuan min siam chhan tihlawhtling tura a ropui nana thawka, a thupekte zawma ni tin hun hmang mai tur kan ni.

He khawvelah hian ro (asset) a awm lo, sum leh pai, in leh lo te hi ro a tling lo. Zan khata kang mei emaw,

chhiatrupna avanga chhe vek mai thei a ni a.

Mihring hian ro pakhat kan nei a, chu chu kan thiamna a ni. Lehkha kan thiamna emaw, music kan thiamna emaw, infiam kan thiamna emaw, Pathianin talent min pek kan thiamna hi kan ro neih a ni a. Kan thih pawhin kan thihpui dawn a, kan dam pawha kan dampui tur a ni a, kan thiamna chu kan dam laia kan tihpun ngei ngei tur a ni thung. Tu mahin min laksak thei lova, min chhuhsak thei hek lo. Hei vang hian kan thiamna tipung turin taihmak chhuahin, awm awl leh tei mai mai lova thiamna tak tak nei tura taihmaka thawhrima chhel tur a ni.

Ro dik tak pakhat chauh a awm a, chu chu Lal Isua fa kan nihna a ni. Kan dam pawhin he leiah Isua nena nitin nun hmanga kan lendunna tur leh kan thih pawha vanrama a hnena kan kalna tur chu.

TAWNGTAINA CHHANGTU PATHIAN

– V.L. Ramdina
Champhai Vengthlang

Pawl 5 ka zir laiin, tum khat chu kan bathlarah hian ka thianpa nen toys kan khal a. Kan bathlar sirah chuan kawmthlangte lo chhohna tur step a awm a. Chumi step vela toys kan khalh lai chuan thlang lam atang hian hmeichhe pakhat hi chak deuh mai hian a rawn tlan chho va, chu nu chuan kan toys khalhna bulah tak chuan a purse (pawisa bag) a rawn thlahu ta hlahu mai a.

Chu nu chu, a thlahu tih pawh hre lovin a tlan tlang ta daih mai a. Keini chuan toys kan lo khalh laklawh bawk nen, tu nge a nih kan lo en miah lo va. A pawisa thlahu lai pawh kan hre lo. A tlan chho tih kan hria a. A hnua kan va hawi phei chuan pawisa chu kan toys khalhna bul step-ah chuan a lo awm teuh mai a.

Ka thianpa nen chuan mak kan ti em em mai a. Ka thianpa chu step-ah chuan a tlan chho ve vat a, pawisa thlahu awm kal vel an awm em tih a han en a. Mahse, tu mah kawngpui vela kal a han hmu hman ta si lo va.

Tichuan, pawisa chu kan la a, ka pa te kan pe ta a. Ka pa te chuan, “A neitu chuan an rawn zawng ang a, kan lo pe mai dawn nia,” tiin an dah tha ta a. Toys chu kan khalh chhunzawm leh ta mai a.

Tlai a lo ni a, zanriah kan ei hma deuh chuan police an lo kal ta a. Chu police chuan ka pa te bulah, “In fapa hian in thenawmte pawisa a ru a, kan man dawn,” an rawn ti ta mai a! Ka pa te chuan an hre thiam lo kher mai. Ka ruk a nih loh thu an lo sawi a, ka chhar dan zawng zawngte lo sawiin, pawisa pawh chu kim takin an lo pe let leh thlap a. (Pawisa kha kan thenawmnu

ta a lo ni a! Ani chuanrawn zawng mai lovin, police-ah FIR a lo theh lut a, ka thianpa nen khan min lo ringhlel a lo ni a. Chu vanga police-in min manrawn tum chu an ni). Mahse, police-te chuan ka rukah ngaiin, kan thenawmte inah chuan min hruai pheita a. Chutah chuan min dawp ta chiam mai a.

Min vuak te an tum a. Kan thenawmnu pawh chuan, “I ru Chiang lutuk! Chhuna toys in khalh lai pawhin kawngkhar hi ka kalh lo va, in lut ru Chiang lutuk!” te a lo ti ve vak vak a. Kei chuan eng mah sawi ngaihna pawh ka hre lo. Mak ka ti si, police kha ka hlau bawksi, ka tih loh puiah min puh vak vak bawksi a. Ka ngawi reng a. Police tihngaihna hre lo chuan, “Eng pawh ni se, police station-ah ka hruai chho phawt ang a, chanchin karawn hrilh leh dawn che u nia,” tiin min hruai chhuak ta a.

Kalkawngah chuan min zawt ngat ngat a; mahse, kei chuan ka ruk loh thu leh eng

mah ka hriat loh thuin ka chhang zel a. Ka rilruin ka tawngtai ngat ngat a. Tichuan, zan a lo ni ta a, Bazar kan thleng a. Bazar-ah chuan min tiding ta a, a tiang (Thira siam) chu a phawrh a, “I sawi loh chuan ka vaw hrep che ang a, i ngal ka roll bawk ang. Chuvangin, eng tikah nge i ruk sawi rawh,” te min ti a. Ka hlau si, vuak ka hlau bawksi a; mahse, sawi tur ka nei bawksi lo. Min beng vel a, sawi turin min ti a, eng mah ka hriat loh thu ka sawi zel bawksi a. Tichuan, Police Station-ah min hruai thleng ta a. Chutah pawh chuan min vuak te an tum a, min dawp ngat ngat a; mahse, eng mah sawi tur ka neih tlat loh avangin an beidawng ta a. Police hnenah chuan an pu chuan, “An inah zu dah leh phawt la, naktuk chawhma dar 10:00-ah a pa nen lo kal leh rawh se,” tiin a hrilh a; tichuan, inah min zu dah leh ta a.

A tuk khua a lo var a, ka pa nen kan kal hma chuan, ka pa bulah chuan, “Apa,

ṭawngṭai phawt ang. Chuan, ṭawngṭai zawhah kan kal dawn nia,” ka ti a. Kan ṭawngṭai zawh chuan kan kal ta a. Police station kan thleng a, mi sual an lo vaw mek a, a kephahah an hlap hrep hrep a. Police chuan, “Hemi zawhah kha laia naupang kha kan vaw ve dawn nia,” te a ti a, ka hlau hle mai a. Mahse, ka pa bulah chuan ṭawngṭai char char turin ka hrih a. Khami laia ka rilrua awm ber chu, “Pathianin min hre Chiang em em a, ka ṭawngṭai tlat chuan min vaw ve lo vang, ṭha takin min chhuahtir em em ang,” tih hi a ni.

Ka rilruin ka ṭawngṭai reng a, Pathian hnenah a venhimna ka dil reng a. Police-in thu min zawh lai pawh chuan chhan ngaihna pawh ka hre lo, ka ṭawngṭai reng a ni ber mai.

Tichuan, police lam chuan thu min zawt reng a, ka ruk a ni baw si lo, ka ruk loh thu leh eng mah ka hriat loh thu ka sawi reng a, tihngaihna an hre ta lo va. Tichuan, a tawpah chuan min chhuah ta a ni.

Tun hnua ka ngaihtuah-naah chuan, lo ṭawngṭai ta lo ila, police khan min dawp ang a, min vaw ve hrep mai dawn a lo ni a, Naupang sual dahnaah te min dah ang a, hrehawm takin hun ka hmang dawn a lo ni reng a; mahse, Pathian hnenah ka inhlan tlat a, ka ṭawngṭai reng a, min chhanhim a lo ni.

Pathian hi thil engkimah a rin tlak a, amahah kan tlúk luh reng chuan eng lai pawhin min chhanhim turin a inpeih reng a ni.

America ramah khuan hnam pakhat chuan naupang kum 13 an nih hian ramngaw pilril takah an dah ṭhin a; mahse, an hmuh phak loh chinah an paten ralthuam famkim nen an lo veng reng ṭhin. Chutiang chiah chuan Pathian hian Amah ringtute chu min veng reng ṭhin.

THIH NAWMNA

*– Zaihmingthanga Fanai
Khatla Kohhran NPSS Ztu.*

Pa pakhat damlo hian, "Dam nawmzia hre tawh velin ka damlo," a ti a. Mihring dam chhung nunah hian dam hi a nuamin a hlu ngawt mai. Dam rau rauvah pawh hrehawm taka dam ai chuan nuam taka dam hi a hlu lehzuah. Mahse, chu aia pawimawh leh hlu zawh chu a awm; chu chu thih nawm a ni.

Dam nawmna chu kan lei taksa dam chhung atan chauh a ni a, thih nawmna erawh chu chatuan atan a ni. Thih nawmna chuan dam nawmna pawh a keng tel a, dam nawmna erawh chuan thih nawmna a keng tel ve kher lo.

Dam nawmna hi sum leh pai leh ro thil avangin eng emaw chen chu a neih theih a. Thih nawmna erawh chu suma lei theih a ni ve lo va, Lal Isua Krista thisen avang chauhva neih theih a ni.

Isua Krista thisen avangin chatuan nunna nei kan ni a. Chu nun neitute chuan thih nawmna an nei tel



nghal thin. Chatuan nunna hlu tak a thlawna pek kan nih avang hian hla phuahtu chuan, "Ka lawmna tuifinriat angin a liam a," a lo ti hial a ni.

Thih hnua nun nuam nei tur chuan tuna kan nun hian a kawh dik a ngai a. Thihna ramri kan tawh hnua kawh dik thar thut theih a ni lo. Mihringin a tleipui theih tur khawvelin a pek tam tulh tulhna ramah hian kan rilru

leh ngaihtuahna hi thihna ramri piah vanrama dah chung a nun hman hi a pawimawh hle a. Dam nawmna chauh ngaihtuahna dawi bur hmangin khawvel hian min awi mu ang tih a hlauhawm hle a ni.

Mihring nunah hian tute pawhin pumpelth kan duh ber

A bikin thalai leh naupang zawk zingah phei chuan la thi ve rih lo tura inngaihna a lian zual hle. Mahse, kan la thi ve dawn a, kan thih hun tur hi Pathian thu thu a ni.

Hla phuahtu chuan, "Thih lui kamah zaiin i hming ka fak ang," a ti a. Thih lui kamah pawh zaia a hming fak



chu thihna a ni. Mahse, a hun a lo thlen chuan tu mahin kan pumpelth thei lo.

Thihna hi eng tik hunah emaw chuan kan la hma-chhawn ve dawn tih hre reng siin, thi ve mai lo tura inngaihna kan nei theuh va.

theitute chu thih nawmna nen nuam takin an thi a. Chu nun nei tur chuan thih hnu piah vanram ngaihtuahna nain nun hi a luah a ngai a, Krista thisen avanga a thlawna kan chan tur vanram ngaihhlutnain nun hi a khalh a ngai a ni.

LALBIAKTHUAMA 2018 MBBS ENTRANCE EXAM-A PAKHATNA INTERVIEW

Khawvela kan awm chhunga mihringte tuihalna pakhat, zirna kawnga intlansiakna pawimawh tak, tu man kan ngaihnepe theih reng reng loh, tangka suma lei theih si loh, thluak tha bik, vannei bikte chauhvin an thlen theih, kum 2018 MBBS entrance exam-a Mizo zinga pakhatna chu Kristian Naupang Chanchinbu Editorial Board chuan zawhna tlem te a zawt a, a chhanna chu –

*KN - Kristian Naupang
chanchinbu*

LBṬ - Lalbiakṭhuama

KN - I pian ni, thla leh kum
min hrilh thei em?

LBṬ - Ni 16.3.2001

KN - I nu leh i pa hming
min hrilh thei em?

LBṬ - Ka nu chu Ramfang-
zauvi a ni a, ka pa chu
Lawmawma a ni.

KN - Pianpui unau eng zat
nge i neih?

LBṬ - Pahnih ka nei.

KN - I nu leh i pa hian eng
hna nge an thawh?
Melthum khaw hlun
reng em ni in nih?

LBṬ - Ka pa hi inhlawhin a

rem rem a thawk a, ka
nu hian bazarah chaw
hmeh te a zuar ṭhin.

KN - Eng hnam nge in nih?

LBṬ - Ralte kawlni.

KN - Zirna kawng i zawh
chhoh dan min han
hrilh teh. Khawi
sikulahte nge i kal
ṭhin? Exam-ah i tiṭha
ṭhin em? Eng divi-
sion-ahte nge i pass
ṭhin? Class 10-ah Top
Ten i ni pha em?

LBṬ - Class I-IV hi
Melthum Primary
Sikulah ka kal a, Class
V-VII hi Candid Eng-
lish School, Sai-

khamakawnah ka kal a, Class VIII atanga X thleng hi Govt. Comprehensive Model School-ah ka kal a, Class 11-12 hi St. Paul's-ah ka kal. Term exam leh final exam-ah te ka titha ve thin viau va, a tlangpuiin distinction-ah ka pass thin. Matric-ah khan Mizoram Board hnuai-ah pasarihna ka ni.

KN - Class X i zir laiin in class-ah term exam-ah pakhatna i ni ngai em?

LBT - Aw, ni thin.

KN - Lehkha i zir hian zing, chhun, tlai leh zanah engtia rei nge i zir thin? I zir dan tlangpui kimchang deuhin min han hrilh teh.

LBT - Lehkha ka zir hian ka zir tur subject bik mumal takin routine ka siam a, ka routine anga zir hram hram ka tum thin. Ka routine anga ka zir chuan ni khatah a tam berah darkar 12 chhung

lehkha zir nan hun ka hman thin. Inbual, class kal, chaw ei leh hahchawlh zawk chang tih loh chu lehkha zir nan hun ka hman ber thin.

KN - I chhungten smart-phone an leisak tawh che em? Pawl eng zat i nihin nge an leisak che?

LBT - Aw, leisak tawh e. Pawl 12 ka nih laiin min leisak.

KN - Smart phone hi i zirna atan i hman tangkai em?

LBT - Aw, hman tangkai khawp mai.

KN - I nu leh paten lehkha zir turin an tir thin che em? Nge, i zir lutuk an ti zawk che?

LBT - Tir ngai lo. Zir lutuk pawh min ti chuang lo.

KN - MBBS zir chak hi kan tam hle mai a; mahse, entrance-a tlin hi a har hle mai a. Nang chu i tling mai ni lovin Mizo zingah pakhatna

- i ni thei a, khawiah
nge coaching i kal?
- LBT - ZET-ah.
- KN - MBBS chu khawi
hmunah nge zir i tum?
- LBT - Zir ka tum lo.
- KN - Eng nge zir zel i tum a?
- LBT - B.Tech. Civil Engi-
neering, IIT-ah zir ka
tum.
- KN - Khawi hmunah nge?
- LBT - Kharakpur, West Ben-
gal-ah. Heta tling tur
hian entrance-ah tih
that a ngai hle a;
mahse, Pathian zarah
ka tling ve hlauh va,
MBBS zir aiin ka
thlang ta zawk a ni.
- KN - Eng nge zir i chak ber
a?
- LBT - Computer Science and
Engineering. Chumi
zir tur chuan inziah
tlin a ngai.
- KN - Topper nih hi i tum
reng nge ni a, i
vanneih palh avangin
hetiang hi i thleng?
- LBT - Topper nih hi ka tum
hrim hrim a, ka vannei
ta a ni.
- KN - High school i kal
chhungin mathemat-
ics-ah emaw, subject
dangah pawh sikul
pawh lamah tuition i la
ngai em?
- LBT - Khawiah mah ka la
ngai lo.
- KN - Topper ni tur hian kan
zirna institution nge
pawimawh ang
zirlaite?
- LBT - Zirlaite an pawimawh
ka ti zawk.
- KN - Entrance test-a harsat-
na i tawh leh high
school leh Higher-a i
kal chhunga harsatna
i tawhte min han hrihl
teh.
- LBT - Harsatna lian tham em
em ka tawh lo va;
mahse, entance exam
hma thla li vel a la awm
khan mobile phone-ah
games ka khel ve a, hei
hian ka zirna nasa takin
a tichhia a; mahse, ka
bansan vat a ni.
Tichuan, exam dawn
thla khat la awmah
khan exam dawn rilru
hah ang chi ka nei ve
a. Lehkha ka zir

- mumal thei lo va, ka
tum aiin ka mark pawh
a chhiat phah deuh.
High school leh
Higher-a ka kal
chhung hi chuan
harsatna han tawh sawi
tur em em ka nei lo.
- KN - High school leh
Higher Secondary
School i kal chhunga
kohhran inkhawm leh
Sunday school-a i
inkhawm dan tlangpui
min han hrilh teh.
- LBT - Sunday school leh
Chawlhni chawhnu hi
chu kan inkhawm kim
ve thin. Kohhran
inkhawm hi chu
Chawlhni zanah ka
inkhawm ve thin.
- KN - Pathian fakin i kut i
beng ngai em? A nih
i lam ve tawh em? I
lam nasa nge nasa lo?
- LBT - Beng ngai e. Lam ve
tawh e. Kohhran hlim
lai chuan ka lam ve
nasa thin.
- KN - I lehkha zir dawn tein
tawngtaina i hmang
ngai em?
- LBT - Aw, hmang ngai e.
- KN - Holy Bible hi i chhiar
chhuak tawh em?
- LBT - La chhiar chhuak lo.
- KN - Coaching i kal lai
khan thla tin fee Rs.
2,500/- kha i chawi ve
lo niin ka lo hria a,
engtizia nge?
- LBT - Thla tin test exam kan
nei thin a, pakhatna
apiang kha zirtirtuten
an free thin a.
Pakhatna ka ni ziah a,
ka chawi ve a ngai ta
lo a ni. Thla hnih khat
erawh chu ka test peih
loh avangin ka chawi
ve chauh a ni.
- KN - Tuna i zirna turah hian
i senso tumsak tur che
an awm dawn niin kan
lo hria a. A dik em?
- LBT - Aw, dik e, Pathian
malsawmna a ni. *Firm*
pahnihin ka zirna
senso tur mi tumsak an
inhuam thu an rawn
sawi a, kan lawm
khawp mai.
- (Lalbiakthuama hi Pastor
Lalchhana tupa a ni. – Ed.)

TENNIS KHAWVELA MI LIAN PAHNIH FEDERER-A LEH NADAL-A KHAIKHINNA

– Zohmangaiha
SL&PB, Synod Office

Tennis Court-ah tennis i khel ve tawh em? I la khelh ngai loh pawhin miin an khel lai chu TV-ah i en ve tawh ngei ang tiraw? Tennis game hi khawvelin infiamna a ngaihsan leh mi tam takin – hausakna, hmingthanna leh hmingthatna an hlawh chhuahna game a ni asin.

Naupang bengvar leh fel tak takte chuan tennis player ropui Federer-a leh Nadal-ate hi kan veng tlangval thenkhat aia kan hriat zawk mahte an ni awm e. Tennis khawvelah chuan anni aia ropui leh mi hriat hlawh an awm chuang lo. Tennis avanga khawvel millionaire, mi hausa tawntaw ni thei an ni. Vaw khat champion-ah ringawt pawh, kumin 2018 Wimbledon mipa champion khan British pound 22,50,000/- (India pawisa chuan Rs. 20,31,97,500) lai a hlawh a ni.

Roger Federer-a leh Rafael Nadal-ate pahnih inkar hi tennis-a player pahnihte intihsiakna ropui ber tiin an

sawi thin a. Tennis huang chhungah chauh lo pawh, infiamna dang zawng zawng ngaihtuah tel pawhin a ropui ber pawl chu a ni ngei ang. Heng player pahnihte intlan-siak vanglai kan hmu ve thei hi a vanneihthlak takzet a ni.

Federer-a hi Switzerland ram mi niin August ni 8, 1981 khan a lo piang a. Nadal-a hi Spain ram mi niin June ni 3, 1986 khan a piang thung. Kum ngain Federer-a hi a upa zawk a nih chu. Federer-a hian ding lamin a service a, Nadal-a hi ding lam hmang thiam zawka piang, vei lam hmang rim zawk tura chher chhuah a ni thung.

Anni pahnih hi a malin wawi 35 an lo inhmachhawn

tawh a, ṭanpui neiin vawi thum an intawng tawh bawk. Single match-ah hian Nadal-a hi vawi 21 chak tawhin Federer-a hi vawi 14 a chak tawh thung a; double match-ah Federer-a leh a ṭanpui vawi 1 chak tawhin, Nadal-a leh a ṭanpui vawi hnih an chak tawh thung. Vawi khat double match-ah ṭang dun tawhin hnehna an chang chiang hle.

A hnuai lama an pahnih sulhnu kan khaikhinnaah hi chuan competition bika single match an khelhna aṭanga an sulhnu bik kan khaikhin leh dawn a ni.

Grand Slam bika an intawn dan: Federer-a hian

Grand Slam title 20 la tawhin mipa zinga la hnem ber a ni a, Nadal-a hian vawi 17 a la ve tawh thung a. Wimbledon khelh zawh takah khan rin kai lo zawk Anderson-a chuan quarter final-ah Federer-a chu a vaw thla a. Nadal-a hian Federer-a title lak zat hnaih theihna hun ṭha tak a nei a, Djokovic-a nen semi final hmuhdawm tak khelin a vanduai zawkah a ṭang ta a nih kha.

Wimbledon: Final bikah vawi thum an insu tawh a; Federer-a vawi hnih a champion a, Nadal-a vawi khat a champion thung.

French Open: Final vawi li an khel dun tawh a,

Court chi hrang hranga an inkhelh tawh dan

Court Type	Federer-a (chak)	Nadal-a (Chak)	Total
Grass Court	2	1	3
Clay Court	2	12	14
Hard Court	9	8	17
Indoor Hard Court	1	0	1



Nadal-a zawkin no mawi a la chawi ziah.

Australian Open: Final-ah vawi hnih intawngin vawi khat ve ve an chak. Semi fi-

nal-ah vawi hnih insuin Nadal-a a chak ve ve thung.

Mak deuh maiin US open-ah hian an la intum miah lo thung.

Tournament dangah

Tournament hming	Federer-a chak zat	Nadal-a chak zat
Masters Final Shanghai	3	0
Dubai Tennis Championship	0	1
Masters Series Indian Wells	2	1
Miami Open	1	1
Masters Series Monte Carlo	0	3
Masters Series Rome	0	2
Masters Series Hamburg	1	1
Masters Series Cincinnati	0	1
Masters Series Madrid	1	2
Swiss Indoors Basel	1	0
ATP World Tour Finals	2	1

Federer-a leh Nadal-ate hi tennis player ropui ber ber pahnih an ni a. An record aţang khian khelh thiam lehzuai bikna court an nei tih pawh a lang a. Tu nge thiam zawka, tu hi nge ropui zawk tih zawhna kan chhan dan erawh chu a inang lo fur awm e.

Hetiang khawpa thiam leh hlawhtlinna ropui nei tura an thawh rimna te, an insumtheihna te hi kan entawn chuan keini pawh eng

kawngah emaw tak chuan mi hlawhtling kan la ni ve ngei ang.

Tennis player ropui ber ber an ni a, lawmman no mawi leh sum leh pai tam tak an vaw chhuak tawh chung pawhin chapo mai lova, an la inngaitlawm zawk tlat mai te, an tumte an zah thiamna leh, tu ve ve pawh a mawi lo zawnga an chungchang an insawisak ngai lo te hi an entawn tlak takzet a ni.

HAWH TEH, HLIM TAKIN EI RAWNG I BÁWL ANG

– *Chris M.S. Dawngkima*
Sacrament Dept. Ztu
Ramhlun North

Lehkha zir thatchhe ve tak mai kan nau pakhat hi a chhúngten lehkha zir tùrin an fuih a. Ani lah chuan, "En ula, lehkha thiam sang pui pui hna hmu lo an tam tawh êm hi, lehkha zir ringawt pawh hi engmah a ni lo," tiin thiam leh dik ang reng takin a lo hnial a. Ka rilruah erawh, "Zir loh ringawt pawh eng a ni chuang lo, lehkha thiam tan pawh hna a vãn chuan, a thiam lo tan lek pheih chuan a va vang lehzuall dawn êm!" tih chu a lo lût ve thung a.

Kan hnathawh peih loh chhuanlam te hi a ða ðhìn hlawn ngawt mai, kan tlai chhuanlam te hlei hlei hi a ngaihnawm. Mahse, tlai ðhang an tlai reng a, hma ðhang an hma reng mai hian kan rilru put hmang zâwk hi kan danglamna chu a ni tih a tilang fo.

Tu emaw chuan natna satliah chu palzamin hnathawh ðhulh phah nán a hmang ngai rěng rěng lo. Tu emaw dang chuan a ni tin hna chanpual, ei rawngbàwl leh ðhlèng sil chu tlai phah nan a hmang hek lo. TV ena, mo-

bile phone sik neuh neuh leh zing thawh nachang hre loho hi chhuanlam ða pui pui nèn kan tlai duh zâwk niin a lang.

Kèlsa

Kèlsa hi siam thiam riauva inhriatna ka nei a, ka mood fuh ðum hi chuan bàwlhlo eng eng emaw risk kualin nuam ti takin ka siam a, khual ðhate hlui átán pawh iaiawm loh tak niin ka hria. Bàwl dân inang rau rauvah lungawi vak lo chung a ei rawngbàwl aiin hlim taka ei rawngbàwl hi a tui zâwk a ni tih ka hre thiam ta baw!

Ni tin nun leh hnaa lungáwi lo tlat a awm theih; peih loh satliah vanga bànsan ngawt theih lah a ni si lo. Zirlaia tuina rēng rēng nei lo zirlai a awm theih a, chawhmeh tui lo zeta intilungáwi lui hrām hrām ang deuh hi an ni! Kan thlāk danglam theih loh thilte avānga hnual mai lovin, keimahni zâwk kan inthlāk danglam a t̃ul hun a awm.

Kan ni tin nun leh hnaah lungawina kan zawn a t̃ul a, hlimna t̃ur awm lohna hmunah pawh kan siam chawp a ngai fo! Peih leh peih loh sawi thei dinhmuna kan din loh avāngin zirlaite pawhin mahni intuituaha, 'picnic type' a zir mai a finthlāk hle. Zir hah huna ei t̃ur tuihnai inchhawp mai te, rilru chawlawl chawh harhna t̃ura rimawi han ngaihlhāk zeuh te, pawn boruak thiāng dawng t̃ura chhuahvah mai te hi picnic chi khat chu a ni thei mai ang. Ei rawng kan bawl a nih rau rau chuan mahni leh

mi dangte hrai puar ngei t̃urin, bàwllhlo ṭha mi, 'ph̃urna leh hlimna' i telh zēl ang u.



Hlawh nei cheu! Kan thawhpui pakhat hi pa hlim thei tak a ni roh va. T̃uk khat chu thawhpui ṭhenkhatten pawisa hman hekzia thu leh, hlawh pawh an kham mang loh thu an sawi a. Ani chuan, "Hlawh in sawi elo? Heti pawh hian nuam tia ka lo hlim teh rēng nēn, hlawh te kan lo la nei cheu a ni m̃aw? Thla hlui hlawh pawh ka lo la khawih rēng rēng hlei nēm," a ti ta hlut mai a! Ṭhian kawm thiam, mi invawng leh pa hlim thei tak a nihna chhan hrilhfiaktu ṭha tak a ni.

Kan nun hi peipun (invest) t̃ura pēk kan ni a, tu mahriat loh leh tu nun mah

khawih lova dam chhúng hun hmang ral ringawt tùr kan ni lo. Eng emaw chu kan tih ve a ngai. Kan chêt chhuahna zawng zawngah hian a tẽ emaw, a lian emaw, a nêp emaw, a ropui emaw, làwmman kan dawng ngei ngei òhìn. Eng angin nge nang leh kei hian mi dangte nun kan khawih ve ang? Microsoft Corporation dintu, mi hausa tawntáw Bill Gates-a chuan, **"Retheia i piang a nih chuan i thiam**

loh a ni lo va; mahse, rethei vëka i thi a nih chuan i thiam loh a ni," a lo ti a. Hlawh lâk tùr nei ve lova dam chhung hun hmang mai tùr chu kan ni bîk lo!

America President 26-na, Theodore Roosevelt-a chuan mi huaissen bîkte chanchin hetiang hian a sawi: "Tehna hrui nêna mi dangte vil rengtu hi mi ropui an awm ngai lo va, mi chakte tawlh thlu lai chäng reng òhìn leh,

hnathawktu tihsual hre thei takte pawh hi eng teh ual an ni chuang lo. Intihsiakna tualzáwla mahni infiah ve tùra zuang lût ngei zâwka chuan chawimàwi a hlawh òhìn. Tih sual leh tlûk chäng pawh nei ve mah se phurna



leh inpêkna nei mi, a beisei làwmman chu hlawh chhuak zo lo mah se, theihtâwp a chhuahna avànga mi dawihzepte zínga chhiar tel ve ngai loh tùr mihring chu! Chumi ngei chuan hring nunah fiahna pal tlangin, mi zawng zawng zíngah chawimawi a hlawh òhìn."

Kan ti ve ta rau rau, phür leh hlim takin, mahni lungawi zâanna tùrin bul kan òan tawh hna chu i zo teh ang le.

PATHIANNI

– H. Lalruatkima
Intermediate Dept. ztu.
Armed Veng South

Tin, Pathianin ni sarih niah chuan a thil siam chu a tizo va, ni sarih niah chuan a thil siam zawng zawng chu a chawlhsan ta a. Tichuan, Pathianin ni sarih ni chu mal a sawm a, a serh ta a (Gen. 2:1-3).

Pathianin khawvel a siam hian ni ruk chhung hna a thawk a, a ni sarih ni chu a chawl a, mal a sawm a, a serh tih kan hmu a. Keini, a siam mihringte pawh hian ni tina kan hna te, zirna te chawlin, chumi ni chu serhin amah chibai buk nan hun kan hmang thin a ni.

Min siamtuin min siam chhan ang ngeiin Pathianni serh te, amah fak te, chawimawi te hi kan tih ngei ngei tur a ni. Chutih rual chuan Pathianni kan hman dan te, a biakbuk chhunga kan awm dan te leh inkhawm lai kan awm dan te ngaihtuah hi chuan kan serh tawh lo a tih theih awm e.

Sunday school kan kal hian Pathian be tur te, a thu te zira, amah faka zai tur leh chawimawi tur tein kan kal a ni tih hriat reng a pawimawh hle. Pathiannia inkhawm tura

kan kal hian Pathianin malsawmna chhiar sen loh min pek hrang hrang: hriselna te, thawmhnaw hak tur te, chaw ei tur te, min enkawltu tur nu leh pa te, chhung te leh thil dang tam tak min pek avanga a hnena kan pek let tur, thawhlawm lo hman then te hi Kristian naupangte chuan kan tih miah loh tur a ni. Biak in kan thlenin, mahni thutna tura kan thutin Pathian hnenah tawngtaia inhlan te, inkhawm laia zirtirtute thusawi ngaihthlak te, zirlai tha taka ngaihthlak te hi Pathian chawimawina a ni.

Inkhawm chhung zawnga
inkhawm boruak tibuai
zawnga lo awma, tawng leh
titi te, lo bengchhen te,
zirtirtu hauh ngaia lo awm

te, tui cheng tura lui kal te,
computer games emaw, *mo-
bile games* emaw khelh te leh
mahni tuina lam lam lo
buaipui ringawt te hi



reng te hian min siamtu
Pathian kan zah lo va,
Pathianni kan serh lo tihna a
ni ang. Pathianin Chawlhni hi
serha, ama tan hun pe turin
min duh avangin kan nuam
tih zawng zawnga hun hman
a rem lo va.

Chawhma emaw, chaw-
hnu emaw inkhawm thulha
kawngsirah emaw, *field*-ah
emawa lo inkhelh te, infiam

Pathianni kan serh lo tihna a
ni a, min siamtu Pathian thu
awih lohna a ni tih kan hriat
a thul. Pathianni kan serha, a
thu kan awih zel chuan
Pathianin malsawmna tam tak
min pe dawn a ni. "Tin,
LALPA in Pathian thu in
pawm phawt chuan heng
malsawmna zawng zawngte
hi in chungah a lo awm ang a,
a zui zel ang che u" (Deut 28:2).



Hriatzauna Huang

– Lalremmawia

* Parle-G hi khawvela biscuit hralh tam ber a ni a, ni tin Parle-G biscuit hi bawm (Pack) maktaduai 480 aia tam mah ei ral thin a ni. He thu i chhiar lai pawh hian khawvel pumah he chhang hi bawm 8,000 ei mek a ni.



* Modern history an tiha khawpui lian, a mi chengte maktaduai tling hmasa ber chu London khawpui a ni a, kum 1811-ah khan maktaduai an lo tling daih tawh a ni.



* Nausente hian an pian hlimin rawng dum leh var chiah an hre thei a. Kum khat an tlinin rawng chi hrang hrang an hre thei.



* Venus khi ni heltu planet zinga sana vir zawnga vir awm chhun a ni.



* Thingpuife chiah chi (Tea bag) hi tum reng vanga siam chhuah a ni lo. Thingpui no khat daih tawk tura thingpuife in chhin tur an fun chu miin an lo duh phian a, an c h i n g chhunzawm ta hlauh a ni.



* Reggae music lalpa tih hial khawpa zaithiam leh rimawi tum thiam Bob Marley-a, a thih dawna dollar maktaduai 30 zet nei chuan kum 1981-a a thih dawn khan a fapa Ziggy-a h n e n a h , “Nunna meuh hi chu pawisain a lei thei lo a ni e,” a ti.



* Khawvela dak bawm (Post-box) thuk ber chu Japan rama Susami Bay-a tui chhung metre 10-a thukah a awm.



* US leh Canada inrinaah khuan ennaawm chhuahna (Opera House) a awm a. Ram pakhat zawkah dawhsan (stage) an siam chuan a entu zatve vel chu ram lehlamah an awm a ngai. US lamah dawhsan an siam chuan a entu zatve vel chu Canada ramah an awm a ngai tihna a nih chu.



* *Home Alone* film kha in en tawh em? Kha film-a a changtu naupang, Kevin-an movie film a en, *Angels with Filthy Souls* tih kha film puitling a ni lo va, *Home Alone* film-a lang tur liau liauva minute khat chhung awh an chan a ni.



* Facebook hotupa (Co-Founder) Mark Zuckerberg-a khuan ni tin t-shirt rawng ngai hlir a ha thin a. A chhan chu, a kawr hak ber tur a ngaihtuah khawtlai loh nan a ni.



* Isaac Newton-a'n lei hipna a hmuhchhuah phahna apple kung kha, a naupan laia an chenna in bulah tun thlengin a la ding reng a, a la buk tha hle bawk.



HRE THEI RAWH

(A hnuaia a dikna en hmain chhang rawh.)

1. Mizoramah Autonomous District Council eng zat nge kan neih?
2. ‘Zoram Varṭian’ tih lehkhabu ziaktu kha tu nge?
3. India rama civil chawimawina sang ber eng nge?
4. Mizote bawih ban a nih theihna tura sulsutu Zosap ropui tak kha tu nge?
5. Mizorama chanchinbu hmasa ber, Mizo ṭawnga tihchhuah kha eng nge a hming?
6. Mizo zinga Matric pass hmasa ber tu nge?
7. Mizo pipute thla chhiar danin January thla hi eng thla nge ni?
8. Mizo zingah Lok Sabha member leh Rajya Sabha member ni kawp thei awm chhun kha tu nge?
9. Mizote zinga ringtu hmasa ber kha tu nge?
10. Mizote zinga ziaak leh chhiar thiam hmasa ber kha tu nge?

1. Pathum. 2. Lalhrualitluanga Ralte. 3. Bharat Ratna. 4. Dr. Fraser. 5. Mizo chanchin Laisuih, 1898 atanga tihchhuah. 6. R.D. Lêta, 1910-ah a pass. 7. Pawlkut thla. 8. Dr. C. Silvera. 9. Taibawnga, March 1895-ah ringtu a ni. 10. Khamliana, Lungleng Lal.

NAUPANG INKHAWMPUI

(Thu chham mi)

– Upa H. Ngurthansanga
Mission Vengthlang

1. Kum tin khel lova lo thleng thin, Naupang Sunday School Inkhawmpui hi a lo va hlu tehlul em! Kan thiam ngai loh – Thu inchhang te, Pathian thu chang te leh Pathian fakna hla te kan zir a, kan thiam em em zel mai si a. Kan dam chhungin kan thinlungah hian a cham reng tawh dawn a ni.
2. Pathian thu chang leh fakna hla, intihsiakna atana kan hman thinthe hi aw! Khawvel thila intihsiakna dang ang hi a ni ve der mai si lo va. Pathian thuchah puan chhuahna leh, kan nun hruaina tura inpuahchahnate a ni zawk si a. Chuvangin, inel mah ila, kan iner hauh si lo. Van lam atangte khian a hmuhnawm ve thin ngawtin ka ring a ni.
3. Naupang fel tak takten special item an rawn din chhuahpui a. A hmuhnawm a, a ngaihnawm bawk si. A uiawm, a rei lo thin e.
4. Mahse maw, kan ti leh hram teh ang, kan inkhawmpui hi a la zo reng reng hlei nem. Kum tina inkhawmpui kan neih thinthe hi chu *rehearsal* chauh a la nih hi. Inkhawmpui tak tak chu chhum zinna piaah ram nuamah khian, chatuan atan kan la hman dawn tih hi in ngaihtuah ve ngai em aw?
5. Chu inkhawmpui tiak ve tawh ngai lovah chuan maw, vawiina naupang zawng zawngte hi kan tel kim thei lovang tih hi ka hlau a ni. Chuvangin, kan thu zir te, kan hla zir te leh kan thu ngaihtlak thin zawng zawngte hi, hawh u, a tak takin i nunpui theuh ang u.
6. Kawngkhar mawiah, inkhawmpui tiak tawh lohna hmunah chuan, kan la intawkhawm ngei dawn si a. Chu hmunah chuan hmuh leh ngei che ka duh ang a. I tel ngei ang tih hi min tiam thei la ka va ti em ve aw! Kim taka kan tel vek theih nan kan inkhawmpui hman mek ngei pawh hi kan zaa tan Lalpan malsawm mawlh rawh se.

PATHIAN ROPUI NAN FOOTBALL KA KHEL THIN

- *Lallawmkima*
Leader, Junior Dept.
Durtlang Kohhran

Football in khel ve thin em? In khelh ve thin chuan Portugal leh Real Madrid player Cristiano Ronaldo-a emaw, Argentina leh Barcelona player Lionel Messi-a emaw hi in hriat ve ngei ka ring.

Tunlai khawvel football khel thinah chuan he mite pahnih hi an thiam bakah, an pet goal theih em avangin an lar dun khawp mai. Tun tumah chuan Ronaldo-a leh Messi-ate meuh pawhin thiam an tih ve êm êm, France Club hausa leh khawvel huap pawha Club tha ber pawl, Paris Saint-Germain (PSG) tana goal khung hnem ber, Pathian ring tlat mi Edinson C a v a n i - a chanchin hi ngun takin in lo chhiar ve dawn nia aw.

Edinson Cavani-a hi a hming pum chu

Edinson Roberto Cavani Gomez niin February ni 14, 1987-ah Uruguay khawpui lian ber dawttu Salto-ah a lo piang a. A pa hming chu Luis Cavani-a a ni a, a nu hming chu Berta Gomez-i a ni. Cavani-a hi a naupan lai atangin El Matador tiin a hming lem vuahsak a ni. Unau pianpui mipa pahnih a nei a, chungte chu Walter Guglielmone-a leh Christian



Cavani-ate an ni. An chhungkua hi football-ah an tui bawk a, a ute pahnih pawh hian football an khel ve ve thin a. An unau thum hian striker position-ah vek an khel nghe nghe a ni.

Cavani-a pawh hian naupan tet atangin football a tui em em a. Kum 20 mi chauh a la nih laiin, a naupan tet atanga a inzir chhuahna Uruguay club Danubio, Montevideo khua atangin khatih hun laia Italy rama Football Club lian tak Palermo chuan Euro maktaduai 4.475-in an lei a. Hemi hnu atang hian taima taka football khel zelin, vawiin thlengin hma a la sawn ta zel a ni.

Chhungkaw rethei tak atanga sei lian in awm ve em? Edinson Cavani-a pawh hi chhungkaw rethei ve tak atanga sei lian a ni. A pa pawh hian football a khel ve thin tho na'ngin, an retheih em avangin hnathawh a ngai si a, nupui a neih hnu phei chuan sangha manin ei a

zawng ta a ni. A pa hian a hnathawhna hmunah Cavani-a te unau pawh hi a hruai ve fo thin. Sangha phurhna tur truck (Motor) thar leh lawng lian nalh tak takte hi a awt ve em em thin a. Tum khat chu a pa chuan truck hlui tawh tak khalh chungin Cavani-a pawh a hnathawhnaah a hruai ve a. A pa motor chu chhia a ti ve deuh tawh ngang a ni ang, “Apa, football ka khel zel ang a, hlawh tam tak ka neih hunah truck thar leh lawng lian pui ka lei ang che,” tiin a pa hnenah chuan a sawi nghe nghe a. Vawiinah chuan Edinson Cavani-a chuan a pa chu truck (Motor) thar nalh tak tak leh Uruguay-a lawng lian ber a leisak ta nghe nghe a ni.

Nu leh pa thu in awih em? Cavani-a te chhungkua hi Kristian chhungkaw tha tak niin an hlim thei em em a. Nu leh pa thu an awih em em bawk. An unau pawh an inhau ngai mang lo va, an hun awl apiangah a pa hovin hlim takin an inkhel thin a. An

unau thum hian football khelin hlawhtling vek mah se, khawvel huapah chuan a naupang ber Edinson Cavani-a hi a taima ber a, a lar ta ber a, a hlawhtling ta ber bawk a ni. A naupan laia a pain sangha an man dun thinnaa a sawi, *“Pathian malsawmna dawng tlaka taima tak leh theihtawp chhuaha football i khelchuan i hlawhtling ngei ngei ang,”* tia a fuihna chu a rilruah a vawng reng a.

A mi mal nunah leh a thil tawn hrang hrangah harsatna tam tak tawk ve bawk mah se, a inbawh behtir duh lo va. Pathian malsawmna dawng tlakin taima takin a thawk a, vawiinah chuan khawvel Football Club hausa ber pawl Paris Saint-Germain (PSG) tan khel mekin, ram leh club tan goal a la khung belh zel a, khawvel footballer hlawhtling berte zinga mi leh hlawh tam ber pawl a lo ni ta a ni. Edinson Cavani-a hian kumin World Cup-ah pawh an ram Uruguay tan a rawn khelkha in lo hmu ngei ang.

Pathian ṭih mi Edinson Cavani-a thusawite

“Kei chu footballer Kristian ṭha ka ni ringawt lo va, Lalpa tana infiam mi ka ni.” “Kan inkhelh hma leh inkhelh zawh bakah, ka pet goal apiangin lawm thu sawiin ka ṭawngṭai ziah ṭhin. A chhan chu, chak loh châng a tawrh thiam dan leh hnehna ka chan pawha ka chapo loh nan.” “Football hi mahni hlawkna atan chauh ka khel lo va, Lal Isua rawng ka bawl vena kawng pakhtah ka ngai ṭhin.” “Champion vanga ka lawmna ai mahin ka chhungteho nena hlim taka Lalpa hnena kan ṭawngṭai ṭhin hian min tilawm zawk.” “Inkhelh ka chawlhsan huna ka hna hmasa ber tur chu mite hnena Lal Isua Chanchin Ṭha hril a ni.” “Ka kar khat hlawh aṭangin sawma pakhat hi Pathian tan ka pe let ṭhin.” “Lal Isua ka rinna kawngah tun thleng hian hrehawm tihna emaw, inchhirna emaw pakhat mah ka la nei lo.” “Ka tan chuan Lal Isua hi he khawvela ṭhian ṭha leh rinawm ber a ni.”

CHEI RAWH LE!




A nalh dan tur ang berin
han chei leh phawt mai teh le...



16 = orange

17 = red

18 = black



KA HMUH ANG HMU THEI RAWH



A chung a lemziak chi hnih khi ngun takin en la, a inan lohna chi riat hmu thei rawh.

A hnuaiah hian a chhanna lo ziaak la:

- 1.....
- 2
- 3.....
- 4.....
- 5.....
- 6.....
- 7.....
- 8.....

To,



**Khatla North Kohhran
Sacrament Department-In Synod Office an tlawh.**